

3 JON

Mi mhoiigimhoiiyan yokwowa Jon siya winkiya, ya siir nomiiyauwin yipikin siya naingwokwonanaeyin Gaias nikiuwiyin ya siiram winkika. Jon siya min boinkikin siyu miyikin Gaia siya nwowiyin mi siya ninkinwamwarkii boiniyin siyu bibiyeyim inkam biyanin min dapiyin Daiotrefis siya tirim simiir. Iriig.

¹Kara Jonkin, Adi Komii siir piugana sair biyan inkamkin ta yokwowa kara Gaias kiriiram winkikin, yipikin kara naingwokwonanaeyin. Dimusi rani, ni kira ini Adi Komii krimiir Wanin siirgisiir siyu iirar nwowin.

²Ti kariir nomiiyauin kara naingwokwonanaeyin, kara ha naingwowi kira maki kipi nii mi yio ini mi owin kira hiriinan wadieyar mi owim kiriir kwoinin rirmiya siya nwowiyin Adi Komii siiram wakaeyokna apam siir hiriinan dwo. ³Kara ina ninokninkinin. Dimusi rani, nomiiyau nhirim ha nitim kariirin sima ini boini hiniin kira Kraisiir ya imiirin ha sibgu wakaeyokna apikim. Inokinin ni kira Adi Komii siir siyugisiyiu iirar napikin. Mi ta yaiya kariirin maigimaiga saeya nwowaiginiugin. ⁴Mi an kara hiniina wakaekin, kariir nomiiyauim tariinanin sima ini Adi Komii siirgisiir siyu iirar nwowin mi ti dimin hiriinanin kariir kwoinin siya hugrimkripkin maigimaiga komii nwowamin. Dimin whirki kariirin hiriinan bi tirkin maigimaiga kara nwowamin. Niingaka. Iriig.

Sima Gaias siir boinkim miyim siya miriim wadie wadiekinairgim

⁵Wim kima ti nomiiyauim kara naingwokwonanaei ima wim kima Adi Komii siir dimin kibi kibi imiir tirkim mi Adi Komii siir iikamim hinda tinda nwowim yipiki Adi Komii siir ya imiir boinmauwuwim simiirin ini kimar kigriraowim. Kima simiir whwonkam imiir bi kig ninokninkinkim mi kima simiirin ina mi whinkinsiis haiginiuwim. ⁶Mi iikam nhirim ha nitim krimiiram mi iikamim Adi Komii siir piugana sairim krimiirin sima ini boinmauuni hiniin simiirin kima whinkinsiis haiginiugin. An kara hiniina naingwowi kima simiirin hiriyar whinkinsiis haiginiukripkai mi simiirin dimin taemin ha timi hauu mi ta hiriinan sairsika sima wi hinda tinda asi nami Adi Komii siir ya imiir

boinmimauwamam. Mi ti dimin hiriinanim yipiki kima tirim simiir Adi Komii siya kimiir mii aiiram in ini maingimairga ywokiyan. ⁷Mi sima simiir om imiir haiburgigim mi ha namim Adi Komii siir yai imiir boinmimauwam mi sima dimin taemin bi priihaigim iikamim yipiki Adi Komii siir yai imiiram naingwo tibmii kiin karamae nwowiyim simiir hirankin. Niingaka. ⁸Mi simiirin krimar whinkinsiis haiginu mi krime kigrirao mi ta hiriinan sairsika sima krime dimin taeminim wi yaripar tiri mi Adi Komii siir yai ima. Iriig.

Daiotrefis Demitrias sowa

⁹Mi kara yokwo bidi winkiyan ti iikamim ta maeyau sair hiranim yipiki Adi Komii siiram naingwo tibmii kiiniyim simiiram. Mi yio Daiotrefisin, ti inkamin yipiki simiir biiyan inkam nwowam naingwowin siya kariir bi nikiunakin siir kigriraowamin. ¹⁰Mi ta hiriinan sairsika, iya kara niti mi ti dimin taeminim siya tirim kara wi kiriir nini boinmimauuni, siya kinaopitkaigaiyu boinamim krimiir mi sima sima rani, siya nomiyauim yipikim Adi Komii siir yai imiir boinmimauwamim simiir boinkim hiniin ha wit mi simiiram bi mi kiwawinkim simiir omaka hiriir namam. Niingaka. Mi ti iikamim yipiki simiir nikiuna apnupokaiyam tirim simiir omaka hiriir, simiirin kimidiniya siya mi ikidu. Mi siya simiirin hindara bi nikidugin, siya simiirin hindara nikrip iuguskikin Adi Komii siir iikamim simaka hainanam. ¹¹Ti kariir nomiyauim kara naingwokwonanaeyim, kima dimin biyie kipi tir mi ti dimin taemin hiriinanim simiir kipi wakaeyokna ap. Kima ti iikamim yipiki mii miyik imiirara miriyyim simiir hiriinan tir, yim sima Adi Komii siir iikamkim. Mi ti iikamim yipiki inokiinokin dimin biyie biyeyim sim tirnanaeyim, yim sima Adi Komii siir iikam tani. Niingaka. ¹²Ikam whiekakim yim hiniina boinkim Demitriasin yio wadiekin. Siir siyiuin wadiekin mi siya inokiinokin siyarin hiniina nisiimauwikin siya wadiekin. Mi nim krime iripi hiriinan hiriyyar mi boinkim siirin, siya inkam wadiekin. Mi kima bidiyar yinokninkinim hiniin krimiir yayim yim yai kaimwo imairgim.

Nikopkaigian yai aeya

¹³Yaiyim kara winam tirim kimiiram kasa rani mi kara simiirin kimiiram winkiyim pi boriisopi yokwoni. ¹⁴Mi tariinanin kara wi kimimin tani wi kapi nitsauwi kimiiram, kimiir kignakiyamin mi dimin taeminim wi krimar nwoki idwo boinaiyim.

¹⁵Kara ha naingwowa kima iripa hiriyyar dongwomamair aekripkai. Nomiyauim tiranim sima kimiir nokboinmamaigikim sima kimiirin yapayapa nwinra nokboinmamaig digikim. Mi simiir inig imiirar boinki, ti krimiir nomiyauwim yipiki waraur nwowim. Iriig.